



ԱՌ ՄԻԱԼՈՐՈՒՄ

**ՊԱՀԵՍՏԱԶՕՐԻ ՀԱՄԱԿԱՐԳԸ ԵՒ ՊԱՀԵՍՏԱԶՕՐԱՅԻՆ ՈՒԺԵՐԸ
ՀԱՅԱՍՏԱՆԻ ՀԱՄԱՊԱՐՓԱԿ ՊԱՇՏՊԱՆՈՒԹԵԱՆ ԵՒ
ԱՆՎՏԱՆԳՈՒԹԵԱՆ ՀԱՄԱԿԱՐԳՈՒՄ**

տարբերակ՝ 1.3
էջերի քանակ՝ 25
ամսաթիվ՝ 8 օգոստոս, 2025

Բովանդակություն

Փաստաթղթի մասին.....	2
1. Ռազմավարական համահիւսդ եւ պահեստազորի համակարգի վերափոխման հրամայականը.....	3
2. Հասարակութեան, պետութեան եւ պահեստազորի միջեւ յարաբերութեան փոփոխութիւնը՝ Հայաստանի Համապարփակ Պաշտպանութեան եւ Անվտանգութեան Համակարգի շրջանակում.....	7
3. Պահեստազորի համակարգի եւ պահեստազորային ուժերի կառուցուածքը, գործառոյթները եւ կարողութիւնները.....	10
4. Խրախուման համակարգ, անձնակազմի կառավարման միասնական համակարգ.....	17
5. Պահեստազորի համակարգի եւ պահեստազորային ուժերի բարեփոխման առաջարկներ.....	20

Փաստաթղթի մասին

Փաստաթուղթը Ոգեգէն համայնքի եւ ԱՌ Միաւորման աշխատանքային խմբի նախաձեռնած վերանայման արդիւնք է՝ նպատակ ունենալով փոփոխուող անվտանգութեան միջավայրում նորովի ձեւակերպել Հայաստանի ՀՊԱՀ համակարգի ներքոյ Պահեստազորի համակարգի եւ Պահեստազորային ուժերի հայեցակարգը:

Այս փաստաթղթի համար հիմք են ծառայել 2022 թուականին ձեւաւորուած, այնուհետեւ «Հորիզոններ» գրքում ամփոփուած ՀՊԱՀ սկզբունքները եւ հայեցակարգային մօտեցումները, ինչպէս նաեւ 2023 թուականին մշակուած Հայաստանի ՀՊԱՀ տեսլականը, որը հաստատուել է Անվտանգութեան խորհուրդի կողմից:

Պահեստազորի համակարգի եւ Պահեստազորային ուժերի զարգացման ազդեցութիւնը պէտք է գերազանցի զուտ պաշտպանական բնագաւառի բարեփոխումների շրջանակը՝ դառնալով փոխակերպման շարժիչ ուժ՝ միաւորելով հասարակութեան եւ պետութեան բոլոր բնագաւառները:

1. Ռազմավարական համահիւսդ եւ պահեստազօրի համակարգի վերափոխման հրամայականը

1.1 Հայաստանի անվտանգութեան ապահովման նոր մօտեցում

Հայաստանի ձեւաւորած անվտանգութեան համակարգը անկարող եղաւ լայնածաւալ ռազմական դիմակայութիւն իրականացնել տարածաշրջանային ուժային կենտրոններ ներառող դաշինքի դէմ: Այդ դաշինքի կողմից ռազմական ուժի ցուցադրման կարողութիւնը հնարաւոր չէ չէզոքացնել միայն Հայաստանի պետութեան ռազմական ներուժով, ուստի անհրաժեշտ է զսպման ռազմավարութեան մշակումը՝ հիմնուած հայ ազգի անվտանգութեան եւ Հայաստանի համապարփակ պաշտպանութեան եւ անվտանգութեան համակարգի (ՀՊԱՀ) վրայ: Այս նոր մօտեցումը հիմնուած է յետխորհրդային ժամանակաշրջանի ազգային եւ ռազմական անվտանգութեան համակարգի հիմքից տարբերուող այլ հայեցակարգային, իմաստասիրական եւ համակարգային սկզբունքների վրայ:

Իրավիճակն էլ աւելի է բարդանում այն հանգամանքով, որ տեսանելի ապագայում Հայաստանը չի կարող ապաւինել ռազմական դաշինքներին եւ պէտք է նախատեսի իր անվտանգութեան համակարգի վերափոխումը՝ հիմնուելով բացառապէս սեփական ազգային կարողութիւնների վրայ: Բացի այդ, առաջիկայ տարիներին տարածաշրջանային անվտանգութեան միջավայրը կառաջնորդուի «գորշ գօտու» եւ տարասեռ պատերազմի տրամաբանութեամբ ու լեզուաբանութեամբ:

Այն երկրների փորձի ուսումնասիրութիւնը, որոնք հիմնել են իրենց պաշտպանական համակարգերը համապարփակ անվտանգութեան մօտեցմամբ, ցոյց է տալիս, որ Հայաստանի ՀՊԱՀ-ը ունակ է կանխարգելել տարածաշրջանային ուժային կենտրոնների կողմից ռազմական ուժի կիրառումը կամ դրա սպառնալիքը: Ռազմական յարձակման դէպքում այն ապահովում է համազգային դիմադրութեան կազմակերպման հիմք, հակառակորդին անընդունելի մնաս հասցնելու եւ վերջնականապէս նրան Հայաստանի տարածքից դուրս մղելու հնարաւորութիւն:

1.2 Պահեստազօրի համակարգի փոփոխուող դերն ու նշանակութիւնը

Հայաստանի ՀՊԱՀ-ի շրջանակում պահեստազօրի համակարգի դերը եւ նշանակութիւնը ՀՀ մարտական կարողութիւնների ապահովման գործում կտրուկ վերափոխման փուլում են: Եթե նախկինում պահեստազօրի համակարգը նախատեսուած էր որպէս համալրման աղբիւր՝ ըստ Գլխաւոր շտաբի պահանջի, ապա նոր ռազմավարական պայմաններում այս գործառնությունները պէտք է զգալի չափով ընդլայնուեն եւ լրացուեն գործուն ունակութիւններով, որոնք կը երաշխաւորեն առաջացած մարտավարական խնդիրների կատարումը: Ուշադրութեան կենտրոնում պէտք է լինի պահեստազօրի համակարգի զարգացումը, որը պէտք է ներառի նաեւ պահեստազօրային ուժերը:

Հաշուի առնելով Հայաստանի հնարաւորութիւնների սահմանափակումները կանոնաւոր զօրքերի քանակի եւ կարողութիւնների ընդլայնման հարցում՝ պահեստազօրի համակարգի եւ պահեստազօրային ուժերի կարելիութիւնը զգալի չափով աճում է: Զօրամիաւորումների հրամանատարները եւ օպերատիւ մակարդակի ղեկավարները պէտք է պատրաստ լինեն ոչ միայն պահեստազօրայիններին կանոնաւոր ստորաբաժանումներին ինտեգրելու, այլ նաեւ իրենց տրամադրութեան տակ ստանալ պահեստազօրային ուժերից կազմուած ինքնուրոյն գումարտակներ, որոնց մարտական պատրաստութիւնը թոյլ կը տայ մարտական խնդիրներ կատարել:

Այս մօտեցումը պահանջում է պահեստազօրայինների վերապատրաստման եւ մարտական պատրաստութեան ներկայիս համակարգի արմատական վերանայում: Երկրորդ արցախեան ռազմարշաւը ցոյց տուեց, որ Հայաստանի պահեստազօրայինների մեծ մասը ոչ միայն բարդ մարտական գործողութիւնների համար անհրաժեշտ հմտութիւնների չէր տիրապէտում, այլ անգամ տարրական զինավարժական պատրաստութիւն չուներ:

Բացի այդ, ժամանակակից սպառազինութեան բարդութիւնն ու պատերազմների նոր տիրոյթների զարգացումը պահանջում են, որ պահեստազօրայինները ունենան գրեթէ նոյն մակարդակի պատրաստութիւն, ինչ կանոնաւոր զօրքերը: Հրթիռային համակարգերի, թռչող սարքերի սպասարկման մասնագէտները, ինչպէս նաեւ տեխնոլոգիական եւ հեռահաղորդակցութեան ոլորտի մասնագէտները պէտք է պատրաստ լինեն անմիջապէս գործողութեան անցնելու՝ առանց լրացուցիչ վերապատրաստման: Անհրաժեշտ է Հայաստանի պահեստազօրի համակարգում ապահովել տեխնիկական մասնագէտների, բուժանձնակազմի եւ այլ կենսական օժանդակ ստորաբաժանումների մարտական պատրաստութեան բաւարար մակարդակ:

1.3 Պահեստազօրի համակարգի թերութիւնները

Հայաստանի պահեստազօրի համակարգում առկայ են մի շարք կառուցուածքային թերութիւններ, որոնք խիստ սահմանափակում են դրա արդիւնաւէտութիւնը: Դրանք պէտք է վերանայուեն նոր շրջանակում.

1. Հայաստանի ներկայիս պահեստազօրի համակարգը կառուցուած է այն ենթադրութեամբ, որ թշնամու ուժերի եւ ռեսուրսների նկատմամբ եթէ ոչ համաչափութեան, ապա համադրելիութեան կարելի է հասնել: Ներկայ պայմաններում այդպիսի համաչափութիւնը անհասանելի է, եւ անվտանգութեան համակարգը պէտք է հենուի ասիմետրիկ մօտեցումների վրայ: Պահեստազօրի վերափոխուած համակարգը, որպէս ՀՊԱՀ-ի անբաժան բաղադրիչ, պիտի ապահովի ասիմետրիայի կիրառումը:
2. Ժամանակակից պատերազմներում զինուած ուժերի մարտունակութեան պահպանման համար անհրաժեշտ է բազմաբնոյթ եւ փոփոխուող հմտութիւնների եւ կարողութիւնների համալիր: Այդպիսի մասնագէտների պատրաստումը միայն ռազմական կրթական համակարգով բարդ խնդիր է անգամ մեծ ու հզօր պետութիւնների համար: Շատ երկրներում որպէս լուծում դիտարկուում է

պահեստազորային ուժերի օգտագործումը որպես մարտունակ զորքի այլընտրանքային եւ դինամիկ աղբիւր, որի հետեւանքով նաեւ վերասահմանուում է պահեստազորային ուժերի դերն ու նշանակութիւնը:

3. Հայաստանի պահեստազորի համակարգը կառուցուած է քանակական տրամաբանութեամբ, ինչը հանգեցրել է անձնական բնոյթի կորստի եւ անհատականացման պակասի: Այս պահին ՊՆ-ի անձնակազմի կառավարման համակարգը հետեւում է միայն ընդհանուր ցուցանիշների՝ առանց անհատական զարգացման, հմտութիւնների ձեռքբերման ու մարտունակութեան գնահատման: Այս մօտեցումը ժառանգուած է Խորհրդային Միութեան ռազմական վարդապետութիւնից եւ անթոյլատրելի է ժամանակակից մարտական պատրաստութեան պայմաններում:

Արդիւնքում այս համակարգը հնարաւորութիւն չի տալիս իրավիճակային կառավարում կազմակերպել՝ հաշուի առնելով իւրաքանչիւր պահեստազորայինի սոցիալական կարգավիճակը, մասնագիտական առաջընթացը կամ նոր հմտութիւնների եւ կարողութիւնների ձեռքբերումը, որոնք կարող են կենսական նշանակութիւն ունենալ ազգային պաշտպանութեան համար: «Չհաշուառուած պահեստազորային» գաղափարն անթոյլատրելի շքեղութիւն է Հայաստանի համար: Անհրաժեշտ է արմատապէս վերաիմաստաւորել իւրաքանչիւր պահեստազորայինի դերն ու տեղը թե կանոնաւոր զինուած ուժերում, թե օժանդակ ստորաբաժանումներում, թե պահեստազորի համակարգում:

Ժամանակակից SCS հնարաւորութիւնները թոյլ են տալիս մշակել տեղեկատուական հարթակներ, որոնք հետեւում են իւրաքանչիւր պահեստազորայինի ծառայութեան ողջ ընթացքին՝ նախազօրակոչային տարիքից մինչեւ թոշակի անցնելը: Այդ համակարգում իւրաքանչիւր հայ զինծառայող եւ պահեստազորային պէտք է ունենայ յստակ դեր, պատասխանատուութիւն, հասկանալի իր գործառոյթը, ինչպէս նաեւ կրի պատասխանատուութիւն՝ անձնական մարտունակութեան մակարդակի պահպանման համար:

1.4 Պահեստազորի համակարգի եւ պահեստազորային ուժերի նոր կառուցուածքը

Պահեստազորի նոր համակարգը՝ ներառեալ պահեստազորային ուժերը, զօրահաւաքի պայմաններում աջակցում է կանոնաւոր ԶՈւ մարտունակութեանը, բայց միաժամանակ ունակ է իրականացնել զսպման ռազմավարութեան բաղադրիչ գործառոյթներ:

ՀՊԱՀ-ը պէտք է ապահովի կանոնաւոր ուժերի եւ պահեստազորի ինտեգրման զարգացումը՝ ուղղուած ամբողջական համակցուած ուժի ձեւաւորմանը: Հարկաւոր է զարգացնել տարածքային պաշտպանութեան մոդելը եւ հասարակական միաւորումները եւ հարթակները, որոնք հնարաւորութիւն կը տան առաւել արդիւնաւէտ օգտագործել պահեստազորայինների հմտութիւնները, կարողութիւնները եւ փորձը:

Պահեստագործի նոր համակարգը պահեստագործայինին կընկալի ոչ թե որպես պասիւ ռեսուրս, այլ որպէս քաղաքացի, որը գիտակցաբար ստանձնում է երկրի պաշտպանութեան պարտականութիւնը: Համակարգը կապահովի այդ պարտականութիւնն իրագործելու համար տարբեր եղանակներ, ներառեալ՝

- ոգեշնչման բարձրացում՝ երկրի պաշտպանութեան եւ զինուած ուժերի մարտունակութեան մէջ նշանակալի մասնակցութիւն ունենալու հնարաւորութեան շնորհիւ,
- առաւել ազատ ընտրութիւն, թե ինչպէս է պահեստագործայինը իր հմտութիւնները տրամադրում ՀՊԱՀ-ին,
- համապարփակ ֆիզիկական եւ վերիորային ենթակառուցուածք՝ ներառեալ կրթական եւ վարժական կենտրոններ, որոնք համապատասխանում են պահեստագործայինների պահանջներին ու հնարաւորութիւններին,
- քաղաքացիական հմտութիւնների եւ մասնագիտական կարողութիւնների ընդլայնում կիրառում ՀՊԱՀ-ում եւ Զինուած ուժերում,
- խթաններ, որոնք կը խրախուսեն պահեստագործայիններին ստանձնելու այնպիսի պարտականութիւններ, որոնք այժմ հիմնականում կատարուում են զինծառայողների կողմից:

Համապատասխանաբար, նոր պահեստագործի համակարգը եւ պահեստային ուժերը ապահովում են՝

- զօրահաւաքի եւ կանոնաւոր ստորաբաժանումների տեղակայման ընթացքում լրացուցիչ ուժերի ձեւաւորման հնարաւորութիւններ,
- մասնագիտական ներուժի ներգրաւման հնարաւորութիւն, որոնց շարունակական ծառայութիւնը զինուած ուժերում տնտեսական առումով ոչ արդիւնաւէտ է:
- զինուած ուժերի թուաքանակի արագ աւելացման հնարաւորութիւն՝ պահեստագործի համակարգի և պահեստագործային ուժերի նոր կառուցուածքի շնորհիւ:

Այս համակարգի տեղակայումը ենթադրում է՝

- օրէնսդրական փոփոխութիւններ՝ պահեստագործայինների նոր դասակարգում ներմուծելու եւ պահեստագործային ուժերի տեսակների և պաշտպանութիւնն ու անվտանգութիւնն ապահովող պետական հաստատութիւնների միջեւ անցումները առաւել հասանելի եւ պարզեցուած դարձնելու համար,
- զինուած ուժերի և պահեստագործայինների թուաքանակի նպատակային ցուցանիշների վերանայում՝ ընդլայնելով կարողութիւնները Հայաստանի ռազմական ծրագրերի մշակման գործում,
- բիջէտային ռազմավարութեան վերանայում պաշտպանական ծախսերի ընդլայնմամբ՝ ուղղուած պահեստագործի համակարգի և պահեստագործային ուժերի զարգացմանը:

Այնպիսի պահեստազորի համակարգի ձեւաւորումը, որը ունակ կը լինի իրագործել վերոնշեալը, բարդ եւ բազմաբաղադրիչ խնդիր է: Սակայն, առանց ՀՊԱՀ շրջանակում այդ համակարգի զարգացման Հայաստանը անկարող կը լինի ապահովել պետութեան եւ հասարակութեան ռազմական եւ ազգային անվտանգութիւնը: Փոփոխուող անվտանգութեան միջավայրում առկայ սպառնալիքներին հակազդելու համար նախատեսուած պահեստազորի համակարգը եւ պահեստազորային ուժերը կառուցուում են հետեւեալ հիմնարար սկզբունքներով՝

- պահեստազորի համակարգի, հասարակութեան եւ հայ ազգի փոխյարաբերութեան վերախմաստաւորում,
- պահեստազորի համակարգի եւ պահեստազորային ուժերի դերի ընդլայնում՝ թե գինուորական գործի, թե քաղաքացիական կեանքում,
- այնպիսի պայմանների ստեղծում, որոնք հնարաւորութիւն կը տան պահեստազորայինին լիարժէք իրացնել իր ներուժը,
- պահեստազորի համակարգի եւ պահեստազորային ուժերի նկատմամբ ընկալման փոփոխութիւն՝ թե հասարակական, թե ազգային մակարդակում:

2. Հասարակութեան, պետութեան եւ պահեստազորի միջեւ յարաբերութեան փոփոխութիւնը՝ Հայաստանի Համապարփակ Պաշտպանութեան եւ Անվտանգութեան Համակարգի շրջանակում

ՀՊԱՀ-ի շրջանակում պահեստազորի համակարգի եւ պահեստազորային ուժերի զարգացման համար անհրաժեշտ է լիարժէք ներգրաւել պահեստազորայինների մասնագիտական կարողութիւնները, հմտութիւնները եւ փորձառութիւնը՝ այդ կերպ ամրապնդելով պետական եւ հասարակական դիմակայունութիւնը: Սա իր հերթին բարձրացնում է պահանջները պահեստազորայինների, գործատուների, հասարակական կազմակերպութիւնների, կրթական համակարգի ու գիտակրթական միջավայրի, պետական հաստատութիւնների եւ եկեղեցու նկատմամբ՝ պահեստազորի համակարգի եւ պահեստազորային ուժերի ձեւաւորումը դարձնելով համազգային նախաձեռնութիւն:

Պահեստազորի համակարգի եւ պահեստազորային ուժերի կայուն հիմքի հաստատման համար պետական կառոյցներում, այդ թւում նաեւ մշակութային դաշտում, անհրաժեշտ են խորքային փոփոխութիւններ: Պետութիւնը պարտաւոր է վերանայել իր վերաբերմունքը պահեստազորայինների նկատմամբ եւ ապահովել բարելաւուած պայմաններ՝ պահեստազորային ծառայութիւնը խրախուսելու եւ այն որպէս պատուաբեր եւ գրաւիչ պետական եւ հասարակական գործունէութիւն ներկայացնելու համար:

Փոփոխութիւնները կը վերաբերունեն նաեւ հասարակական, մասնաւոր եւ պետական ոլորտների փոխյարաբերութիւններին, որոնց ճշգրիտ ներդաշնակեցումը անհրաժեշտ ներուժ կը ստեղծի պահեստազորի համակարգի եւ պահեստազորային ուժերի լիարժէք գործունէութեան համար: Դա իր հերթին կը խորացնի փոխազդեցութիւնը հասարակութեան

եւ պաշտպանական ոլորտի միջեւ՝ նպաստելով Հայաստանի պաշտպանական կարողությունների եւ ազգային դիմակայունության ամրապնդմանը: Ի վերջոյ, պահեստազօրի համակարգի եւ պահեստազօրային ուժերի ազդեցութիւնը հայկական հասարակութեան եւ պետութեան վրայ կը գերազանցի զուտ պաշտպանական բնագաւառի բարեփոխումների շրջանակը՝ դառնալով փոխակերպող գործօն հայ ժողովրդի եւ պետութեան զարգացման բոլոր բնագաւառներում:

2.1 Հասարակութիւնը

ՀՊԱՀ-ի շրջանակում Հայաստանի դիմակայունութեան բարձրացման եւ թշնամույն յարձակումների յուսալի զսպման կարողութիւնների ապահովման համար պահանջուում է որակական նոր մակարդակի համագործակցութիւն պետութեան, տեղական ինքնակառավարման մարմինների, հասարակական եւ մասնաւոր ոլորտների, Եկեղեցու եւ ողջ հայ ազգի տարբեր շերտերի միջեւ: Այնուամենայնիւ, նման համագործակցութիւն նախաձեռնելու համար կառավարութեան հնարաւորութիւնները սահմանափակուում են մի շարք գործօններով, այդ թւում՝

- կառավարման անարդիւնաւէտութիւն եւ գործառոյթների կրկնութիւն պետական համակարգում,
- սահմանափակ վերահսկողութիւն ռազմավարական նշանակութեան ռեսուրսների, կենսական ենթակառուցուածքների եւ մասնաւոր ոլորտի նկատմամբ,
- քաղաքացիների շրջանում իրազեկութեան պակաս՝ ՀՊԱՀ-ի եւ պահեստազօրի համակարգում իրենց դերի եւ տեղի վերաբերեալ:

ՀՊԱՀ-ում հասարակական, քաղաքացիական եւ ռազմական կառավարման համակարգերը պէտք է համաձայնեցնեն իրենց գործողութիւնները, եւ պատասխանատուութիւններն ու գործառոյթները բաշխեն պետական համակարգի եւ հասարակութեան միջեւ, այլ ոչ թե կենտրոնական բացառապէս պաշտպանութեան և անվտանգութեան համար պատասխանատու պետական հաստատութիւնների շրջանակներում:

Այս տեսակէտից, պահեստազօրի համակարգը եւ պահեստազօրային ուժերը ունեն երկակի եւ իւրայատուկ բնոյթ՝ մի կողմից, դրանք խորը ներառուած են հասարակութեան մէջ, քանի որ պահեստազօրայինները ապրում եւ աշխատում են իրենց համայնքներում, իսկ միւս կողմից՝ դրանք պաշտպանութեան եւ անվտանգութեան համակարգի կենսական բաղադրիչ են: Նոր համակարգի շրջանակում պահեստազօրայինները կարող են ծառայել որպէս մշակութային կամուրջ՝ ճգնաժամերին եւ յարձակումներին արձագանքելու քաղաքացիական և ռազմական մեխանիզմների համադրման գործում:

2.2 Պետութիւնը

ՀՊԱՀ ներդրման շրջանակում, հենուելով դիմակայունութեան ապահովման ընդլայնուած մօտեցման վրա, Հայաստանի կառավարութիւնը հնարաւորութիւն է ստանում օգտագործել պահեստազօրի համակարգը ու պահեստազօրային ուժերը՝ պետական, մասնաւոր եւ

հասարակական ոլորտների ջանքերը համադրելու եւ ինտեգրելու նպատակով: Միեւնոյն ժամանակ, կառավարութիւնը պարտաւոր համակարգել միջոլորտային խորհրդակցութիւններ՝ ճգնաժամի կամ պատերազմի դէպքում պահեստազօրի համակարգի եւ պահեստազօրային ուժերի զօրահաւաքի եւ ռազմական կարողութիւնների ընդլայնման ուղիները սահմանելու համար:

2.3 Հասարակական, մասնաւոր, գիտակրթական եւ պետական ոլորտներ

ՀՊԱՀ գաղափարախօսութեան զարգացմամբ Հայաստանում ձեւաւորում է ռազմական անվտանգութեան աւելի բարդ համակարգ, որտեղ Ձինուած ուժերի առկայ կառուցուածքը լրացում է տարածքային պաշտպանութեան ուժերով, պահեստազօրային եւ այլ ուժերով՝ ձեւաւորելով հաւասարակշռուած եւ համակցուած ամբողջական ուժեր: ՀՊԱՀ-ի շրջանակում ձեւաւորուող համակցուած ամբողջական ուժերը հնարաւորութիւն են տալիս բազմազանել պաշտպանական խնդիրները, թոյլ տալով Հայաստանի կանոնաւոր զինուած ուժերին կենտրոնանալ կենսական նշանակութեան մարտական խնդիրների լուծման վրայ՝ առանց շեղուելու այն խնդիրների վրայ, որոնք կարող են ստանձնել պահեստազօրային եւ այլ ուժերը:

Գիտութիւն եւ կրթութիւն. Պահեստազօրի համակարգը եւ պահեստազօրային ուժերը նախատեսում են համագործակցութեան հաստատում կրթական համակարգի եւ համալսարանների հետ՝ ակադեմիական դաշտի կադրային ներուժի հիման վրայ մասնագիտացուած պահեստազօրային ստորաբաժանումների ստեղծման նպատակով: Համալսարանները կարող են մասնակցել ՀՊԱՀ-ի կառուցման գործընթացին եւ այս համագործակցութեան շնորհիւ օգտուել իրական միջավայրում հետազօտութիւններ եւ փորձարկումներ իրականացնելու համար անհրաժեշտ միջոցներից:

2.4 Հասարակական, մասնաւոր եւ պետական ոլորտների ինտեգրման տեսլականը

Հայաստանի զինուած ուժերի միացեալ հրամանատարութեան կառուցուածքի ներդրումը կը պահանջի զգալի ջանք եւ ի վերջոյ կը յանգեցնի մշակութային փոփոխութեան՝ եւ հայկական պետութեան, եւ ազգային մակարդակում: Առանց այդ մշակութային փոփոխութեան՝ անկարելի կը լինի ազգային անվտանգութեան համապարփակ մօտեցման ամբողջական իրագործումը՝ ազգային, պետական եւ համայնքային մակարդակներում:

Կանոնաւոր եւ պահեստազօրային ուժերի, տարածքային պաշտպանութեան ուժերի (ներառեալ տեղական պաշտպանական բաղադրիչների) միջեւ արդիւնաւէտ հաւասարակշռութեան ապահովումը մարտահրաւերի միայն մի մասն է, անհրաժեշտ է նաեւ պետական ու հասարակական կառոյցների ներդաշնակ փոխգործակցութիւն: Պահեստազօրի համակարգի եւ պահեստազօրային ուժերի զարգացման համար անհրաժեշտ է պետական, հասարակական եւ մասնաւոր ոլորտների միջեւ գործընկերութեան խորացում՝ ներառեալ բարձր որակաւորում ունեցող մասնագէտների ներգրաւումը եւ գործատուների համար խթանների ստեղծումը:

ՀՊԱՀ-ի շրջանակում պահեստազորի համակարգի եւ պահեստազորային ուժերի մշակումն եւ ներդրումը կը մեծացնի պահեստազորայինների դերը Հայաստանի դիմակայունության ապահովման մէջ եւ կը պահանջի պահեստազորայինների ներգրաւման պաշտօնականացում՝ քաղաքացիական-ռազմական համագործակցութեան համակարգում: Այս գործընթացը կը նպաստի նաեւ տարածքային պաշտպանութեան ամրապնդմանը, ռազմավարական կառոյցների պաշտպանութեան յուսալիութեան բարձրացմանը եւ կենսական ենթակառուցուածքի անվտանգութեան ամրապնդմանը՝ պահեստազորի ամբողջ ներուժի օգտագործման միջոցով:

Հայաստանի պահեստազորի համակարգի եւ պահեստազորային ուժերի վերափոխումը պահանջում է միասնական շրջանակի եւ վարդապետութեան մշակում, ինչպէս նաեւ բարեփոխումների գործընթացը կառավարող յատուկ տեղայնացուած կենտրոնի ստեղծում: Այդ կենտրոնը պէտք է զերծ լինի քաղաքական ազդեցութիւններից եւ ներառի ներկայացուցիչներ հասարակական եւ մասնաւոր ոլորտներից՝ ապահովելով գործընթացի կայունութիւնն ու շարունակականութիւնը: ՀՊԱՀ-ի, նոր պահեստազորի համակարգի եւ պահեստազորային ուժերի բարեփոխումները կը ծաւալուեն մի քանի քաղաքական շրջափոխերի ընթացքում եւ պէտք է յուսալի կերպով պաշտպանուած լինեն կարճաժամկետ կուսակցական շահերից:

3. Պահեստազորի համակարգի եւ պահեստազորային ուժերի կառուցուածքը, գործառոյթները եւ կարողութիւնները

Հայաստանի նկատմամբ շարունակական բնոյթ կրող ռազմական սպառնալիքները պահանջում են պահեստազորի համակարգի եւ պահեստազորային ուժերի դերի ընդլայնում ազգային պաշտպանական ռազմավարութեան շրջանակում: Պահեստազորի համակարգը եւ պահեստազորային ուժերը պէտք է դուրս գան Զինուած Ուժերի համալրման եւ մարտական ներուժի մեծացման համար զուտ օժանդակ կառոյց լինելու սահմաններից եւ դառնան Հայաստանի պաշտպանական ճարտարապետութեան գործուն բաղադրիչ եւ ստանձնեն աւելի լայն գործառոյթներ: Օրինակ՝ ժամանակակից պատերազմի պայմաններում կարեւորութիւն է հասարակական եւ մասնաւոր ոլորտներում առկայ հմտութիւնների, կարողութիւնների եւ մասնագիտական համայնքների հասանելիութեան ընդլայնումը: Պահեստազորայինները կարող են դառնալ նոր հնարաւորութիւնների եւ պատերազմի կերպերի կրողներ աւանդական կարծրացած ռազմական անվտանգութեան համակարգերում:

Հայաստանի ռազմական համակարգին վստահուած խնդիրների ծաւալի եւ բարդութեան կտրուկ աճը պահանջում է պահեստազորի գործառոյթների ակտիւ զարգացում եւ պահեստազորային ուժերի ինտեգրում պաշտպանութեան ամենօրեայ գործառոյթներում, այդ թւում՝

- պահեստազորայինների կարճաժամկետ ներգրաւում՝ ճարտարագիտական բարդ գինատեսակների սպասարկման եւ շահագործման գործում, ինչպիսիք են

կառավարման բազմամակարդակ համակարգերը, հրթիռային կայանները, հակաօդային պաշտպանության եւ թուային պատերազմների լուծումները եւ անօդաչու թռչող սարքերը:

- պահեստազօրային ստորաբաժանումների ստեղծում, որոնք իրենց ամենօրեայ պարտականութիւնների շրջանակում եւ ազատ ժամանակ աջակցում են թուային անվտանգութեան, տեղեկատուական եւ հոգեբանական պատերազմներին դիմակայելու խնդիրների լուծմանը:
- տարածքային պաշտպանութեան ուժերի ներգրաւում տարածքային պաշտպանութեան համակարգի շրջանակում՝ մարտական խնդիրների կատարման նպատակով, ընդհուպ մինչեւ կարճաժամկէտ մարտական հերթապահութիւնը:

Այս ընդլայնուած դերը լիարժէք ստանձնելու համար Հայաստանի պահեստազօրի համակարգի եւ պահեստազօրային ուժերի կառուցուածքը պէտք է փոխուի: Այդ փոփոխութիւնը ենթադրում է կանոնաւոր ուժերի համալրման ւաւնդական գործառոյթի ընդլայնում նոր պահեստազօրային բաղադրիչներով՝

- Համալրման պահեստազօր. ծառայում է կանոնաւոր ուժերի համալրմանը,
- Օպերատիւ պահեստազօր. պահեստազօրային ստորաբաժանումներ ինչպէս նաեւ բարձր պատրաստութեան վիճակում գտնուող ուժեր՝ անյապաղ տեղակայման համար,
- Ռազմավարական պահեստազօր. նախատեսուած է ազգային դիմակայունութեան ամրապնդման համար՝ համախմբելով այն հատուածները, որոնք դեռ ներառուած չեն պաշտօնական պահեստազօրի համակարգում:

Բոլոր երեք բաղադրիչներում պահեստազօրի համակարգը եւ պահեստազօրային ուժերը ներառում են նաեւ գործառոյթային բաղադրիչներ, այդ թուում՝ Տարածքային պաշտպանութեան համակարգում գործող Տեղական պաշտպանական ուժեր եւ արդի պատերազմների եւ բարդ զինտէխնիկայի շահագործման համար նախատեսուած պահեստազօրային ստորաբաժանումներ:

3.1 Համալրման Պահեստազօրը

Չնայած, որ համալրման պահեստազօրի հիմնական գործառոյթը մնում է Զինուած ուժերի եւ ազգային անվտանգութեան համակարգի ստորաբաժանումների համալրումը, այն կարող է ընդլայնել իր դերը եւ կիրառուել պաշտպանական ոլորտի ամենօրեայ միջոցառումների եւ նախագծերի իրականացման աջակցման համար: Այդ համատեքստում կարելի է նշել հետեւեալ գործառոյթներն ու հնարաւորութիւնները.

- Հայաստանի պաշտպանութեան գործում մասնակցելու պատրաստակամութիւն ցուցաբերող անձանց միջոցով ապահովել հասանելիութիւն հասարակական եւ մասնաւոր ոլորտների հմտութիւններին, կարողութիւններին, փորձառութեանը եւ մասնագիտական համայնքներին:

- Ներգրաւել ոլորտային քաղաքացիական մասնագիտացուած փորձագիտական ներուժ, օրինակ՝ ճարտարագիտութիւն, թուային անվտանգութիւն, տեղեկատուական կամ բժշկական կարողութիւններ եւ այլն:
- Պաշտպանութեան ոլորտում կարճաժամկէտ թափուր հաստիքների համալրում: Սա կը բարձրացնի մարդկային ներուժի կառավարման կայունութիւնը, որն այլապէս կը պահանջի գործող կազմի վերաբաշխում՝ բացեր առաջացնելով այլ ուղղութիւններում:

3.2 Օպերատիւ պահեստազօրը

Ռազմական սպառնալիքների ծաւալի եւ իրավիճակի սրութեան պայմաններում Հայաստանի կանոնաւոր ուժերը հարկադրուած են լինելու մարտական գործողութիւնների իրականացման համար առաւելապէս ապաւինել պահեստազօրին: Սա ենթադրում է, որ որոշ մարտական կարողութիւններ պէտք է փոխանցուեն կանոնաւոր ուժերից պահեստազօրային ուժերին, իսկ այդ փոխանցման արդիւնաւէտութիւնը կախուած է մի շարք առանցքային գործօններից:

Առաջին հերթին կարեւորում է պահեստազօրի համակարգի կարողութիւնը՝ ապահովելու պահեստազօրային ուժերի մարտական պատրաստութեան անհրաժեշտ մակարդակը, որպէսզի վերջիններս կարողանան մոբիլիզացուել ժամանակին եւ կատարել առաջադրանքները ըստ ծրագրի: Մարտունակութեան անհրաժեշտ մակարդակի պահպանումը՝ յատկապէս ստորաբաժանման մակարդակով համընդհանուր կարողութիւնների տեսանկիւնից, առանձնապէս բարդ խնդիր է: Ժամանակակից զինատեսակներն ու ռազմական ճարտարագիտական լուծումները պահանջում են երկարատեւ ուսուցում եւ վարժանք, ինչպէս նաեւ զգալի միջոցներ՝ պահպանման եւ շահագործման համար:

Բարձր պատրաստութեան մակարդակի ապահովման համար անհրաժեշտ են այնպիսի մասնագիտական հմտութիւններ եւ հրամանատարական կատարողականութիւն, որոնք պահեստազօրայինների սահմանափակ ազատ ժամանակի պայմաններում միշտ չէ, որ հնարաւոր է ուսուցանել:

Այս խնդիրների լուծման պատասխանատուութիւնը կարող է ստանձնել օպերատիւ պահեստազօրը, որը ենթադրում է բարձր մակարդակի մարտական պատրաստութիւն ոչ միայն անհատ պահեստազօրայինների, այլեւ պահեստազօրային ստորաբաժանումների համար: Օպերատիւ պահեստազօրի իւրաքանչիւր ստորաբաժանման չափը եւ մարտական գործառոյթները վճռորոշ գործօններ են պահեստազօրի համակարգի՝ մոբիլիզացիայի եւ պատերազմի պայմաններում անհրաժեշտ մարտական արդիւնաւէտութեան մակարդակին հասնելու կարողութիւնը գնահատելիս:

Պահեստազօրային ուժերը կունենան ինքնուրոյն կառուցուածք եւ կը գործեն աշխարհագրական ուղղութիւններով: Պահեստազօրային ստորաբաժանումները պէտք է ձեւաւորուեն բրիգադային եւ գումարտակային մակարդակներում:

Պահեստազորային ուժերը կունենան առանձին զինտեխնիկայ եւ հրամանատարական կառուցուածք, եւ կը գործեն Զինուած ուժերի ընդհանուր համակարգում: Երեւանաբնակ պահեստազորային ուժերը կունենան առանձնայատուկ դերակատարում՝ հաշուի առնելով Հայաստանի ժողովրդագրական կառուցուածքը:

Պահեստազորային ուժերի կառուցուածքում կը ներառուեն նաեւ տարածքային պաշտպանութեան ուժերը: Ընդհանուր հրամանատարութիւնն ու ղեկավարումը կիրականացուի պահեստազորային ուժերի եւ տարածքային պաշտպանութեան ուժերի հրամանատարութեան միջոցով՝ Գլխաւոր շտաբի ենթակայութեամբ:

Ակտիւ պահեստազոր. Այն պահեստազորային ստորաբաժանումները, որոնք ունեն մարտական պատրաստութեան բարձր մակարդակ եւ կարող են գործել կանոնաւոր ուժերի, յատուկ գործողութիւնների ուժերի եւ այլ ստորաբաժանումների հետ համատեղ, յատուկ կարգավիճակով կը համարուեն Ակտիւ պահեստազոր: Սա կը դառնայ Հայաստանի պահեստազորի համակարգի կարեւոր բաղադրիչը:

Հաշուի առնելով նաեւ այն հանգամանքը, որ պահեստազորի համակարգում որոշ պահեստազորայիններ տարբեր պատճառներով չեն կարող զօրակոչուել, Ակտիւ պահեստազորի ստորաբաժանումները պէտք է նախօրօք պատրաստեն աւելի մեծ քանակով պահեստազորայիններ՝ տեղակայման պահին անհրաժեշտ անձնակազմի երաշխաւորման նպատակով:

3.3 Ռազմավարական պահեստազորը

Հայաստանի նկատմամբ սպառնալիքների բնոյթի, ծաւալի եւ շարունակականութեան փոփոխուող պայմաններում անհրաժեշտ է ձեւաւորել ռազմավարական պահեստազոր՝ կազմուած այն անձանցից, ովքեր պատրաստ են ծառայել որպէս պահեստազորայիններ, սակայն չունեն պահեստազորի համակարգի շրջանակում պաշտօնապէս սահմանուած իրաւական պարտաւորութիւններ: Այլ կերպ ասած, ռազմավարական պահեստազորի զգալի մասը կազմուած կը լինի կամաւորներից, որոնք կունենան համեմատաբար ցածր մարտական պատրաստութիւն եւ պատրաստութիւն:

Ռազմավարական պահեստազորն առանցքային դեր ունի հայ հասարակութեան եւ ազգի դիմակայունութեան ամրապնդման գործում: Օրինակ՝ ռազմավարական պահեստազորի անդամները կարող են արտակարգ իրավիճակների կամ պատերազմի ժամանակ կամաւոր կերպով մասնակցել տարածքային պաշտպանութեանը:

Ռազմավարական պահեստազորի մասնակցութիւնը կարող է դառնալ անհատների խրախուսման եւ քաղաքացիական ներգրաւման ուղի՝

- իրենց հմտութիւնները եւ փորձը ներդնել պահեստազորում,
- կամաւոր ներգրաւուել ճգնաժամերի կամ զինուած հակամարտութիւնների ժամանակ,
- երիտասարդ պահեստազորայինների եւ նորակոչիկների համար ծառայել որպէս խորհրդատու:

3.4 Ճարտարագիտական ոլորտի դերը Հայաստանի պահեստազորի համակարգում

Ժամանակակից զինտեխնիկայի կարողությունները լիարժեք օգտագործելու եւ նոր տեսակի պատերազմներում արդիւնաւէտ գործելու համար Հայաստանի պահեստազորի համակարգը պէտք է ձեւաւորի մասնագիտացուած պահեստազորային ստորաբաժանումներ՝ համալրուած ճարտարագիտական ոլորտի մասնագէտներով եւ փորձագէտներով: Այս ստորաբաժանումները պէտք է կարողանան լուծել մարտական բնոյթի խնդիրներ, այդ թւում՝ թուային համակարգերի շահագործում, պաշտպանութիւն եւ յարձակում, ինչպէս նաեւ գործողութիւններ թուային եւ էլեկտրամագնիսական դաշտերում: Նման ստորաբաժանումները կարող են ներգրաւուել նաեւ ռազմական կապի եւ ազդանշանային ցանցային համակարգերի պաշտպանութեան գործում, հակառակորդի ցանցերի խափանման գործում, հետախուզական տեղեկութեան հաւաքագրման գործում: Մասնագիտացուած ստորաբաժանումները կարող են նաեւ բարձրացնել Հայաստանի կարողութիւնները՝ էլեկտրոնային պատերազմի, անօդաչու թռչող սարքերի (ԱԹՍ) եւ հրթիռային համակարգերի ոլորտներում:

Պահեստազորի համակարգը պէտք է նաեւ նախապատրաստի, տեղակայի եւ զինի յատուկ նպատակով գործող պահեստազորային ստորաբաժանումներ, օրինակ՝ կարճ հեռահարութեան հակաօդային համակարգերով: Կանոնաւոր ուժերի գործողութիւնների հետ համադրուած այս օդային պաշտպանական ստորաբաժանումները կարող են խափանել հակառակորդի կողմից օդային գերակշռութեան հասնելու փորձերը եւ խիստ բարդացնել հայկական օդային տարածքի նկատմամբ վերահսկողութեան հաստատումը:

Հաշուի առնելով այս գործողութիւնների բարդութիւնը՝ նման մասնագիտացուած պահեստազորային ստորաբաժանումները պէտք է անցնեն ոչ աւանդական եւ առաւել յաճախակի ուսումնական շրջափուլեր՝ տեխնիկական ունակութիւնների պահպանման եւ արագ փոխուող օպերատիւ միջավայրում պատրաստութեան ապահովման նպատակով:

3.5 Պահեստազորային ուժերի հրամանատարութիւնը

Պահեստազորի համակարգի եւ պահեստազորային ուժերի ընդլայնուած դերն ու գործառոյթները պահանջում են պահեստազորային ուժերի հրամանատարութեան ձեւաւորում՝ Գլխաւոր շտաբի ենթակայութեամբ: Հաշուի առնելով, որ Թուրքիան ունի ժամանակակից զինատեսակներ, որոնք նախատեսուած են նախազգուշացման ժամկէտը նուազագոյնի հասցնելու համար, Հայաստանը պէտք է ունենայ ճգնաժամի կամ նախապատերազմական փուլում պահեստազորային ուժերն արագ զօրահաւաքելու կարողութիւն՝ պաշտօնական հրամանից յետոյ ոչ ուշ քան 24 ժամուայ ընթացքում: Սա պահանջում է զօրահաւաքի ծրագրման եւ իրագործման նկատմամբ որակապէս խստացուած մօտեցում:

Խաղաղ ժամանակ պահեստազորային ուժերի հրամանատարութեան հիմնական գործառոյթներից է ազգային, տարածքային եւ տեղական մակարդակներում զօրահաւաքային ծրագրերի մշակումն ու վաւերացումը: Պահեստազորային ուժերի հրամանատարութիւնը պատասխանատու է Հայաստանի զօրահաւաքային ներուժի

ծրագրման, վերահսկման, գնահատման եւ հաւաստագրման համար: Հանրային կառավարման բոլոր մակարդակների՝ կենտրոնականից մինչեւ տեղական, ինչպէս նաեւ մասնաւոր եւ հասարակական հատուածների բոլոր բաղադրիչները պարտաւոր են ունենալ եւ պարբերաբար թարմացնել իրենց համապատասխան զօրահաւաքային ծրագրերը, որոնց վերահսկումը եւ գնահատումը ազգային մակարդակում իրականացուում է տեսչական այցերի եւ վարժանքի միջոցով՝ պահեստագորային ուժերի հրամանատարութեան կողմից:

Պահեստագորային ուժերի հրամանատարութիւնն ապահովում է նաեւ Հայաստանի պաշտպանական զօրահաւաքային կարողութիւնների ծրագրման, ստուգման, գնահատման և հաւաստագրման համար՝ ներառեալ պաշտպանական արդիւնաբերական հզօրութիւնները, կենսական ազգային ենթակառուցուածքը եւ ռազմավարական նշանակութեան ընկերութիւնները: Այն նախատեսում է նաեւ երկակի օգտագործման միջոցների եւ ենթակառուցուածքի հնարաւոր առգրաւման գործընթացները:

Ռազմական գործողութիւններին աջակցելու նպատակով քաղաքացիական միջոցների հաւաքագրումը մնում է Հայաստանի կառավարութեան պատասխանատուութեան շրջանակում, սակայն իրականացուում է պահեստագորային ուժերի հրամանատարութեան համակարգմամբ եւ ցուցումով: Իրաքանչիւր նախարարութիւն եւ կառավարութեան մարմին կատարում է իր համար սահմանուած գործառոյթները, իսկ դրանց յստակեցումը զօրահաւաքային ազգային շրջանակում մնում է զօրահաւաքային ծրագրերի առանցքային պահանջ:

Խաղաղ ժամանակ պահեստագորային ուժերի հրամանատարութիւնը իրականացնում է պահեստագորի համակարգի կառավարում, պահեստագորային ուժերի կազմակերպում, ուսուցում եւ վարժանք, պահեստագորայինների վերապատրաստում՝ հիմնական զինուորական հմտութիւնների պահպանման, նոր եւ նորացուած զինատեսակների ուսուցման եւ արագ տեղակայման պատրաստութեան ապահովման նպատակով: Հրամանատարութիւնը, արտակարգ զօրահաւաքի դէպքում, իրականացնում է նաեւ նախապատերազմական արագացուած ուսուցում:

Հայաստանի պաշտպանութեան պլանաւորման հիմնական կանխադրոյթն այն է, որ հնարաւոր ներխուժման դէպքում երկիրը կարող է ունենալ առավելագոյնը չորս շաբաթ նախազգուշացման ժամանակահատուած: Սա պարտադրում է տարածքային ռազմական հետախուզութեան կարողութիւնների էական զարգացում՝ ներառեալ բաց աղբիւրների հիման վրայ իրականացուող եւ էլեկտրոնային հետախուզութիւնը: Պահեստագորային ուժերի հրամանատարութիւնը պարտաւոր է այդ ժամանակամիջոցն օգտագործել՝ զօրահաւաքային միջոցառումներ սկսելու, երկիրը նախապատերազմական կամ պատերազմական ռեժիմի բերելու եւ պահեստագորայիններին մարտական գործողութիւնների նախապատրաստելու նպատակով:

Պատերազմի ժամանակ պահեստագորային ուժերի հրամանատարութիւնը, համալրման պահեստագորի կառավարման գործընթացից զատ, պատասխանատու է պահեստագորային ստորաբաժանումների, այդ թուում մասնագիտացուած միաւորների, զօրահաւաքի, կազմաւորման եւ դրանց Գլխաւոր շտաբին ու օպերատիւ հրամանատարութիւններին տրամադրման համար:

Այսպիսով՝ Հայաստանում զորահաւաքը պէտք է դիտարկուի ոչ միայն որպէս ռազմական ներուժի ակտիւացում, այլ որպէս համազգային պաշտպանութեան գործընթաց: Բացի պահեստազօրային ուժերի, տարածքային պաշտպանութեան ստորաբաժանումների ռազմական զօրահաւաքի հարցերից, պահեստազօրային ուժերի հրամանատարութիւնը նախապատրաստական աշխատանքներ է իրականացնում պաշտպանական ռազմավարական եւ արդիւնաբերական օբյեկտների եւ կազմակերպութիւնների, կենսական ազգային ենթակառուցումների մոբիլիզացիայի համար:

Պահեստազօրային ուժերի հրամանատարութեան ենթակայութեան տակ կարող են գտնուել հետեւեալ պահեստազօրայիններ եւ պահեստազօրային ստորաբաժանումներ՝ կախուած հաստիքներից, ստորաբաժանման տեսակից, սպառազինութիւնից եւ պատրաստութեան չափանիշներից՝

- օպերատիւ պահեստազօրային ստորաբաժանումներ եւ պահեստազօրայիններ՝ լեռնահրաձգային վաշտերից եւ գումարտակներից, որոնք մշտապէս ունեն բարձր պատրաստութեան մակարդակ,
- նուազագոյն պատրաստութիւն ունեցող ստորաբաժանումներ եւ պահեստազօրայիններ՝ ներառեալ տարածքային պաշտպանութեան ուժերը,
- յատուկ նպատակով պատրաստութիւն անցած պահեստազօրային ստորաբաժանումներ եւ մասնագէտներ՝ պատերազմի նոր տիրոյթներում եւ բարդ զինտեխնիկայով գործելու համար,
- համալրման պահեստազօր:

Խաղաղ պայմաններում պահեստազօրի համակարգի եւ պահեստազօրային ուժերի զարգացումն իրականացում է պահեստազօրային ուժերի հրամանատարութեան, գործադիր եւ օրէնսդիր մարմինների, տարածքային պաշտպանութեան շրջանում գործող տեղական ինքնակառավարման մարմինների, ինչպէս նաեւ հասարակական եւ մասնաւոր կազմակերպութիւնների ներգրաւմամբ:

Պատերազմական պայմաններում զօրահաւաքային գործընթացի ամբողջական հրամանատարութիւնն ու կառավարումը անցնում է Գլխաւոր շտաբին:

Պահեստազօրային ուժերի հրամանատարութեան կառուցումը կարող է ներառել՝

1. Պահեստազօրային ուժերի հրամանատարութեան շտաբ, որը պատասխանատու է ուժերի նախապատրաստման, զօրահաւաքի ծրագրման եւ բանակավարութեան համար,
2. Քաղաքական, տեղեկատուական, թուային եւ հոգեբանական պատերազմի վարչութիւն, որը պատասխանատու է ոչ-կինետիկ պատերազմի այս ուղղութիւնների կազմակերպման եւ իրագործման համար,
3. Տեսչական վարչութիւն, որը վերահսկողութեան, համապատասխանութեան, չափանիշների մշակման եւ իրաւական հարցերի համար,

4. Տարածքային պահեստազորային հրամանատարություններ, որոնք վերահսկում են ուսումնական կենտրոնները եւ ղեկավարում տեղական պահեստազորային ուժերը,
5. Պահեստազորի համակարգի եւ պահեստազորային ուժերի ուսումնական կենտրոններ,
6. Ենթակայ ստորաբաժանումներ, ներառեալ պահակային ստորաբաժանումներ եւ վարչական-լոգիստիկ միավորներ:

4. Խրախուսման համակարգ, անձնակազմի կառավարման միասնական համակարգ

4.1 Պահեստազորայինի խրախուսման համակարգ

Պահեստազորայինները կարգավիճակով եւ մտածողությամբ տարբերում են գործող զինծառայողներից, նրանք յաճախ ունեն մասնագիտական հմտություններ եւ կարողություններ արագ զարգացող ոլորտներում, ինչպիսիք են թուային եւ տեղեկատվական անվտանգությունը, որոնք ազգային անվտանգության համակարգում դժուար է զարգացնել կամ պահպանել: Բացի այդ, շատ պահեստազորայիններ տարիների մասնագիտական փորձ ունեն արդիւնաբերական կամ այլ բնագաւառներում: Նրանք կարող են մաս կազմել այնպիսի մասնագիտական համայնքների, որոնք կարելի է օգտագործել ճգնաժամի ժամանակ՝ արժէքաւոր գիտելիքի, հաստատական կապերի, մտաւոր ներուժի եւ նորարար լուծումների հասանելիութիւն ապահովելու նպատակով:

Պահեստազորայինների ներուժի լիարժէք օգտագործումը կարող է զգալի կերպով բարձրացնել ՀՊԱՀ-ի եւ ողջ հայ հասարակութեան դիմակայունութիւնը: Սակայն այդ ներուժը իրական մարտական կամ ռազմավարական առաւելութեան վերածելու համար անհրաժեշտ է յստակեցնել պահեստազորայիններին ներգրաւելու խրախուսման եղանակները: Որոշների համար դա կարող է լինել մասնագիտական առաջընթաց կամ քաղաքացիական ոլորտում հմտութիւնների զարգացում, իսկ միւսների համար կարճաժամկետ մարտական հերթապահութեան իրականացման հնարաւորութիւն եւ մարտական պատրաստութեան պահպանում:

Պահեստազորի համակարգը պէտք է պահեստազորայիններին առաջարկի սովորելու, ծառայելու եւ կապեր ստեղծելու հնարաւորութիւն՝ ներառեալ նոր հմտութիւնների ձեռքբերում, ազգային պաշտպանութեանը նպաստում եւ համախոհների հետ ընկերային մթնոլորտում լինելու հնարաւորութիւն: Համայնքի մաս կազմելու զգացումը, փոխադարձ վստահութեան եւ յարաբերութիւնների կառուցման հնարաւորութիւնը շատ հզօր խրախուսման գործօններ են: Պահեստազորային մասնակցութեան ձեւերի բազմազանութիւնն ու համայնքի մաս լինելու գիտակցութիւնը կարող են ներգրաւել այնպիսի մասնագէտների, որոնք այլ պայմաններում չէին դառնայ ՀՊԱՀ-ի գործառոյթների մասնակից:

Անհրաժեշտ է նախագծել մասնագիտական առաջընթացի տարբեր ուղիներ եւ փոխգործակցութեան բազմազան ձեւաչափեր՝ պահեստազօրայինների տարբեր կարողութիւններն ու հետաքրքրութիւնները հաշուի առնելու համար: Պահեստազօրի համակարգը չպէտք է կառուցուած լինի միատարր «մէկ մոդել բոլորի համար» սկզբունքով: Պէտք է մշակուի պահեստազօրայինի կարգավիճակների խելամիտ համադրում, որը կը պահպանի ճկունութիւն եւ անհատական ընտրութեան հնարաւորութիւն, ինչպէս նաեւ Ձինուած ուժերի օպերատիւ կարիքներին համապատասխանութիւն: Հնարաւոր է դիտարկել հետեւեալ պահեստազօրային դասակարգերը.

- Հիմնական պահեստազօր (համալրման եւ օպերատիւ պահեստազօր)՝ այն անձինք, ովքեր օրէնքով ենթակայ են պարտադիր պահեստազօրային ծառայութեան եւ Ձինուած ուժերի կողմից զօրակոչուում են անհրաժեշտութեան դէպքում:
- Պայմանագրային ակտիւ ծառայութիւն՝ պահեստազօրայիններ, որոնք ժամանակաւորապէս ներգրաւուած են գործող ստորաբաժանումներում՝ պայմանագրային հիմունքով՝ ներառեալ մասնակի աշխատանքային ծանրաբեռնուածութեան եւ վճարովի արձակուրդների հնարաւորութեամբ: Այս մոդելը կարող է կարճաժամկէտ լուծում տալ որոշ ստորաբաժանումներում անձնակազմի պակասի խնդիրներին:
- Մասնակի ակտիւ ծառայութիւն՝ առաւել ճկուն պայմանագրային ծառայութիւն՝ յարմարեցուած կարճաժամկէտ տեղակայման եւ յատուկ օպերատիւ առաջադրանքների համար:
- Պայմանագրային ծառայութիւն՝ յստակ սահմանուած դերերի կամ առաքելութիւնների կատարման համար պայմանագրային հիմքով պահեստազօրայինների ներգրաւում:
- Արտաժամեայ ծառայութիւն՝ կամաւոր մասնակցութիւն պաշտպանական գործողութիւններին ոչ աշխատանքային ժամերին՝ դրամային փոխհատուցմամբ, բայց առանց լրացուցիչ պարտաւորութիւնների:
- Կամաւորներ՝ անձինք, ովքեր ծառայութիւնն իրականացնում են առանց վճարի, բացառութեամբ ուղիղ ծախսերի փոխհատուցման:
- Երկարաձգուած ծառայութիւն՝ հնարաւորութիւն այն պահեստազօրայինների համար, ովքեր ծառայում են ժամանակաւոր ակտիւ պահեստազօրի պայմանագրով, բայց ցանկութիւն ունեն երկարաձգել իրենց ծառայութեան ժամկէտը՝ պահեստազօրի համակարգի կարիքներից ելնելով:

4.2 Անձնակազմի կառավարման միասնական համակարգ

ՀՊԱՀ-ի ռազմավարութեան շրջանակում անհրաժեշտ է ներդնել անձնակազմի կառավարման միասնական համակարգ, որը կը ներառի Ձինուած ուժերը, ազգային անվտանգութեան համակարգի այլ գերատեսչութիւններն ու գործակալութիւնները, ինչպէս նաեւ պահեստազօրի համակարգը: Սա պահանջում է փոփոխական կարիերայի մոդելի

որդեգրում, որի շրջանակում պահեստազորայինները հնարաւորութիւն կը ստանան ներգրաւուել տարբեր զինուորական ծառայութիւններում՝ իրենց մասնագիտական կեանքի տարբեր փուլերում: Ներկայիս համակարգը չափազանց կարծրացած է՝ պահպանելով խիստ բաժանում քաղաքացիական ոլորտի եւ գործող զինուորական ծառայութեան միջեւ: Այս իրավիճակը խոչընդոտում է ՀՊԱՀ-ի շրջանակում Հայաստանի պահեստազորի համակարգի եւ պահեստազորային ուժերի ներուժի լիարժէք օգտագործմանը:

ՀՊԱՀ-ի փոփոխական կարիերայի մոդելը պէտք է հնարաւորութիւն տայ պահեստազորայինին ճկուն կերպով տեղափոխուել ռազմավարական, օպերատիւ եւ համալրման պահեստազորի միջեւ, ինչպէս նաեւ ծառայութեան պայմանագրի համաձայն ներգրաւուել ակտիւ ծառայութեան: Համակարգը պէտք է հնարաւորութիւն տայ նաեւ հորիզոնական մուտքի, այսինքն՝ յատուկ ունակութիւններով կամ փորձով որոշ անձինք, պէտք է կարողանան մտնել համակարգ՝ շրջանցելով ամրագրուած ընդունման ընթացակարգերը: Սա թոյլ կը տայ ներգրաւել քաղաքացիական ոլորտի մասնագիտացուած կարողութիւնները՝ տուեալ անձի որակաւորմանն ու փորձին համապատասխան:

Պահեստազորայինների կարողութիւնների լիարժէք օգտագործման համար պահեստազորի համակարգում կարիք կը լինի վերանայել զինուորական աստիճանների շնորհման չափանիշները՝ հիմնուած ոչ միայն դասակարգային համակարգի, այլ նաեւ տուեալ դիրքի մասնագիտական պահանջների վրայ: Սա կարող է ներառել զինուորական աստիճանը զուտ գործառնոյթից կախուած դարձնելը՝ պաշտպանութեան համակարգում բարձր տեխնիկական կամ փորձագիտական դերակատարում ունեցողների համար ստեղծելով նոր «Մասնագէտ» կարգավիճակ: «Մասնագէտ» կարգավիճակը եւ համապատասխան տարբերանշանը կը նշանակեն լիազօրութիւն որոշակի ոլորտում՝ առանց աւանդական հրամանատարական պարտականութիւնների կամ ռազմական փորձառութեան սխալ մեկնաբանման:

Փոփոխական կարիերայի մոդելով կառուցուած համակարգը պահեստազորայիններին թոյլ կը տայ ծառայել այնպիսի դիրքերում, որտեղ նրանք կարող են կիրառել իրենց քաղաքացիական հմտութիւնները եւ փորձը՝ առանց կրկնուող կամ ժամանակատար վերապատրաստման անհրաժեշտութեան: Հորիզոնական մուտքի ուղիների զարգացումը կը թելադրէ ինտեգրումը համակարգ, կը նուազեցնի ուսուցման եւ յարմարակերպման ծախսերը: Քաղաքացիական հմտութիւնների ճանաչումն ու հաւաստագրումը զինուորական հաստիքի համար էլ աւելի կարագացնի այս գործընթացը:

Պահեստազորայինների համար յստակ կարգավիճակների ստեղծումը՝ համադրուած ճկուն ծառայութեան պայմանագրերի եւ փոփոխական կարիերայի մոդելի հետ, զգալի կերպով կը խթանի պահեստազորայինների ներգրաւումը ՀՊԱՀ-ի շրջանակում: Սակայն այս մեխանիզմները պէտք է ամրապնդուեն նաեւ ճկուն եւ ապակենտրոն անձնակազմի կառավարման համակարգով, որն ունակ է համապատասխան մասնագէտներին արագ գտնելու եւ պահեստազորային ուժերում ներգրաւելու: Այս խնդրի լուծման նպատակով անհրաժեշտ է ՀՊԱՀ-ի համար ստեղծել միասնական թուային հարթակ, որը կունենայ արդիւնաւէտ որոնման գործառնոյթներ եւ պահեստազորայինների ներգրաւման հարթակ՝ ունակ օրերի ընթացքում ներգրաւել անհրաժեշտ մասնագէտներին, այլ ոչ թե ամիսների:

Այս մօտեցման համար օրինակելի մոդել կարող է ծառայել Աստրալիայի Total Workforce System-ը: Նմանատիպ համակարգի եւ թուային հարթակի ներդրումը յատուկ ուշադրութիւն եւ ծրագրում է պահանջում:

5. Պահեստազօրի համակարգի եւ պահեստազօրային ուժերի բարեփոխման առաջարկներ

Հայաստանի պահեստազօրի համակարգի եւ պահեստազօրային ուժերի բարեփոխումը բարդ եւ պատասխանատու գործընթաց է: Այն պահանջում է ոչ միայն ինստիտուցիոնալ վերափոխում, այլեւ ռազմավարական մշակութային շրջադարձ՝ այն հարցում, թե ինչպէս է պետութիւնը մօտենում իր պաշտպանութեան եւ զօրահաւաքային համակարգին: Ընդհանուր առմամբ, բարեփոխումների ջանքը պէտք է կառուցուած լինի մի շարք առանցքային փոփոխութիւնների ուղղութիւնների շուրջ, որոնք համատեղ սահմանում են Հայաստանի համար ժամանակակից, դիմակայուն եւ առաքելութիւն կատարելու ունակ պահեստազօրի համակարգի եւ պահեստազօրային ուժերի հիմքը:

5.1 Պահեստազօրի համակարգի, պահեստազօրային ուժերի եւ հասարակութեան փոխյարաբերութեան փոփոխումը

Պահեստազօրի համակարգի վերափոխումը կը բերի որակական փոփոխութեան՝ պետական, հասարակական եւ մասնաւոր ոլորտների միջեւ փոխյարաբերութիւններում: Այս գործընթացների կառավարումը կը պահանջի մշակութային փոփոխութիւնների համապատասխան ծրագրի մշակում:

Վերափոխման արդիւնքները կը լինեն հետեւեալը՝

- քաղաքացիական-ռազմական համագործակցութեան շրջանակում պահեստազօրայինների ներգրաւման պաշտօնականացում,
- պահեստազօրի համակարգի եւ պահեստազօրային ուժերի դերի բարձրացում՝ ճգնաժամի եւ պատերազմի պայմաններում,
- Հայաստանի կենսական ենթակառուցուածքի եւ ռազմավարական բազայի պաշտպանութեան եւ դիմակայունութեան բարձրացում,
- պաշտպանական ոլորտի եւ հայաստանեան հասարակական եւ մասնաւոր ոլորտների միջեւ համագործակցութեան խորացում եւ ընդլայնում,
- պահեստազօրի համակարգի եւ պահեստազօրային ուժերի դերի եւ գործառոյթների ընդլայնում՝ Հայաստանի ազգային դիմակայունութեան ամրապնդման գործում:

5.2 Պահեստազօրի համակարգի եւ պահեստազօրային ուժերի դերի ընդլայնումը

Բարեփոխումների գործընթացի շրջանակում անհրաժեշտ է հետազօտել եւ գնահատել կանոնաւոր ուժերին վերապահուած այն մարտական գործառոյթները, որոնք հնարաւոր է

փոխանցել պահեստազորային ուժերին՝ ուսուցման եւ պատրաստութեան համակարգերում համապատասխան փոփոխութիւններով:

Դրա համար կը պահանջուեն օրէնսդրական փոփոխութիւններ՝ նոր գործառոյթների օրինական ամրագրումն ապահովելու եւ յատկապէս կանոնաւոր ու պահեստազորային կազմերի միջեւ փոխգործակցութեան ճկունութիւնն ու պարզեցումը խթանելու համար: Ներկայումս Հայաստանի օրէնսդրութիւնն ու վարչական ընթացակարգերը խոչընդոտում են անձնակազմի սահուն տեղաշարժը գործող ծառայութիւնից պահեստազոր եւ հակառակը:

Նոր գործառոյթներին աջակցելու նպատակով պահեստազորի համակարգը պէտք է կառուցուի կենտրոնացուած պահեստազորային ուժերի հրամանատարութեան եւ երեք հիմնական բաղադրիչի շուրջ՝ իւրաքանչիւրի համար յստակ սահմանուած դերերով եւ ներքին շարժունակութեան մեխանիզմներով.

- Համալրման պահեստազոր, որը աջակցում է կանոնաւոր Զինուած ուժերին՝ մարտական գործողութիւնների համար վերապատրաստուած անձնակազմ տրամադրելով:
- Օպերատիւ պահեստազոր, որը կազմուած է ինչպէս բարձր պատրաստութիւն ունեցող անհատ պահեստազորայիններից, այնպէս էլ ճգնաժամային իրավիճակներում եւ զինուած բախումների պայմաններում արագ տեղակայման ունակ ստորաբաժանումներից: Այս ստորաբաժանումները ունակ են իրականացնել մարտական գործառոյթներ, որոնք աւանդաբար վերապահուած են կանոնաւոր ուժերին, եւ դրանց պատրաստութեան մակարդակը պահպանուում է կանոնաւոր ու համալիր վարժական շրջափուլերի միջոցով:
- Ռազմավարական պահեստազոր, որը գլխաւորապէս կազմուած է կամաւոր քաղաքացիներից, որոնք պատրաստակամ են իրենց հմտութիւնները, փորձը եւ գիտելիքը ներդնել ազգային պաշտպանութեան գործում: Թե եւ այս հատուածը ընդհանուր առմամբ ունի աւելի ցածր պատրաստութեան մակարդակ, այնուամենայնիւ հանդիսանում է առանցքային զսպման տարր, որը պէտք է պահպանուի գործուն վիճակում եւ պարբերաբար ներգրաւուի ազգային դիմակայունութեան աջակցման գործում:

Այսպիսի կառուցուածքի ներդրումը թոյլ կը տայ Հայաստանին առաջ շարժուել դէպի համակցուած ամբողջական ուժերի ձեւաւորում՝ ապահովելով, որ պահեստազորի համակարգը եւ պահեստազորային ուժերի բաղադրիչները այլեւս չդիտարկուեն որպէս օժանդակ տարր, այլ լիարժէք ինտեգրուեն ազգային պաշտպանական ճարտարապետութեան մէջ:

5.3 Պահեստազորայինի ներուժի իրացումը եւ ՀՊԱՀ-ում անձնակազմի կառավարման միասնական համակարգի ձեւաւորումը

Համակցուած ամբողջական ուժերի ստեղծման արդիւնքում, կանոնաւոր եւ պահեստազորային անձնակազմի տարբերութիւնն աստիճանաբար կը դառնայ առաւել գործառութային, քան կառուցուածքային: Այս փոփոխութեան համար անհրաժեշտ կը լինի ՀՊԱՀ-ում ներդնել անձնակազմի ներգրաւման «խառը» մոդել, որտեղ պահեստազորայինները, ինչպէս նաեւ որոշ յատուկ հմտութիւններով քաղաքացիական մասնագէտներ, կարող են ժամանակաւորապէս փոխարինել գործող ծառայողներին՝ ելնելով օպերատիւ անհրաժեշտութիւնից: Այսպիսի համակարգը պահանջում է անձնակազմի կառավարման մասնագիտական հմտութիւնների բարձր մակարդակ, յատկապէս՝ ուժերի կազմի, տեղակայման եւ խնդիրների բաշխման վերաբերեալ իրական ժամանակում որոշումներ կայացնելու կարողութիւն: Օպերատիւ եւ ռազմավարական մակարդակներում ստորաբաժանումների հրամանատարները պէտք է լիազօրուած լինեն իրենց կազմերը ձեւաւորել եւ մարտական խնդիրները բաշխել ըստ ունակութեան, ոչ թե կարգավիճակի:

Պահեստազորի համակարգի եւ պահեստազորային ուժերի արդիւնաւէտ օգտագործման համար անհրաժեշտ է անձնակազմի կառավարման բազմաշերտ ինտեգրուած մոդել, որը համապատասխանում է եւ կանոնաւոր, եւ պահեստազորային ուժերի արդիւնաւէտութեան չափանիշներին, կարողութիւնների զարգացման նպատակներին, օպերատիւ արդիւնքներին: Այս համակարգը պէտք է լինի ապակենտրոն, ճկուն եւ արագ արձագանքող՝ ունակ օրերի ընթացքում ձեւաւորելու որակեալ պահեստազորային ներուժ: Այս նպատակի իրագործման համար Հայաստանում պէտք է ստեղծուի ՀՊԱՀ անձնակազմի կառավարման միասնական համակարգ, ներառեալ ազգային մակարդակի թուային հարթակ՝ պահեստազորայինների հմտութիւնները, կարողութիւնները եւ փորձառութիւնը գրանցելու եւ փոփոխութիւններին հետեւելու համար:

Համակարգի առանցքային բաղադրիչներից կը լինի մասնագէտների հարթակը, որը կարող է նոյնականացնել, ներգրաւել եւ ճիշտ պահին ճիշտ առաքելութեան համար առաջադրել համապատասխան կարողութիւններ ունեցող անհատներին: Այս համակարգի արդիւնաւէտ աշխատանքն ապահովելու համար անհրաժեշտ է ներդնել ներգրաւման եւ խրախուսման նոր մոդելներ, որոնք պահեստազորայինների համար սահուն եւ ճկուն մուտքի հնարաւորութիւններ կը ստեղծեն պաշտպանութեան համակարգի տարբեր մակարդակներում:

ՀՊԱՀ անձնակազմի կառավարման միասնական համակարգը պէտք է առաջարկի՝

- անձնակազմի կառավարման փուլային եւ յարմարակերպուող շրջանակ, որը կարող է յայտնաբերել, ներգրաւել եւ տեղակայել պահեստազորայիններին ըստ կարողութիւնների եւ փորձ, նաեւ մասնագիտական համայնքները՝ ըստ առաքելութեան եւ ժամանակի պահանջի,

- պարզեցուած եւ համակարգուած ծառայութիւնների փաթեթ՝ ճկուն եւ միաժամանակ չափանիշներին համապատասխան ծառայութեան պայմաններով,
- փոլային մասնագիտական մոդել, որը թոյլ կը տայ պահեստազօրայինին ազատ տեղաշարժուել ՀՊԱՀ համակարգում եւ դրա սահմաններից դուրս՝ ելնելով իր կարգավիճակից եւ պետութեան կարիքներից:

5.4 Պահեստազօրի համակարգի եւ պահեստազօրային ուժերի ռազմավարական դերի բարձրացումը

Կենսական կարելութիւն ունի այն, որ Հայաստանի ռազմական-քաղաքական բարձրագոյն ղեկավարութիւնը լիովին գիտակցի պահեստազօրի համակարգի եւ պահեստազօրային ուժերի ռազմավարական նշանակութիւնը: ՀՊԱՀ շրջանակում պահեստազօրի բարեփոխման գործընթացի մեկնարկի յստակ եւ հրապարակային հռչակումը ինչնին միջազգային հարթակում կարող է հանդէս գալ որպէս զսպման ազդանշան: Պաշտօնական ուղերձը՝ որ Հայաստանի հանդէպ որեւէ ապագայ ներխուժում կը բախուի պատրաստ եւ կազմակերպուած դիմադրութեան, կը սկսի ազդել հակառակորդների ռազմավարական հաշուարկների վրայ: Ռազմական ուժի ցուցադրութեան հարցում տարածաշրջանային կենտրոնների որակական եւ քանակական գերազանցութեանը հակազդելու համար կենսական է ունենալ երկարաժամկետ ռազմավարական մրցունակութեան ունակութիւն:

Որպէս զսպման գործօն՝ պահեստազօրի համակարգի եւ պահեստազօրային ուժերի ընկալումը ենթադրում է այնպիսի ձեւաչափի մշակում, որով հնարաւոր կը լինի հակառակորդի քաղաքական եւ ռազմական ղեկավարութեանը համոզել, որ Հայաստանի պահեստազօրի համակարգը եւ պահեստազօրային ուժերը իրենց ռազմական նպատակների իրագործման համար էական արգելք են հանդիսանում: Պահեստազօրի համակարգը եւ պահեստազօրային ուժերը պէտք է ընկալուեն ոչ թե որպէս պասիւ միջոց, այլ որպէս Հայաստանի պաշտպանութեան առանցքային, գործուն տարր: Հետեւաբար, պահեստազօրի համակարգի ռազմավարական օգտակարութիւնը գնահատելիս պէտք է պատասխանել երկու հիմնական հարցի՝ ի՞նչ իրական ազդեցութիւն կարող են ունենալ Հայաստանի պահեստազօրային ուժերը հակառակորդի վրայ պատերազմի ժամանակ, եւ ի՞նչ գիտի հակառակորդը այդ համակարգի մասին, եւ ինչպէ՞ս կարող է այդ իմացութիւնը ազդել նրա կողմից գնահատուող պատերազմի ելքի ընկալման վրայ:

5.5 Պահեստազօրի համակարգի եւ պահեստազօրային ուժերի բարեփոխման ռազմավարութեան ուրուագծերը

Հայաստանի պահեստազօրի համակարգի բարեփոխման եւ պահեստազօրային ուժերի արդիականացման ռազմավարութիւնը պէտք է ներառի առանցքային բաղադրիչներ, ինչպիսիք են.

1. Պահեստազօրի համակարգը կիրառել որպէս ՀՊԱՀ ռազմավարական գործիք՝ ուժային կենտրոնների կողմից Հայաստանի նկատմամբ ռազմական ուժի կամ այլ ճնշման կիրառումը զսպելու համար: Սա ենթադրում է պահեստազօրային ուժերի

դերի որակական փոփոխության ճանաչում պետական մակարդակով, եւ դրանց ընդգրկում ազգային պաշտպանության եւ անվտանգության ռազմավարություններում, պաշտօնական ուղերձներում եւ հանրային հաղորդակցության ծրագրերում:

2. Վերլուծել, թե ինչպէս պահեստազօրի համակարգը՝ ռազմավարական առումով աւելի նշանակալի պահեստազօրային ուժերի ներդրմամբ, կարող է մաշեցնել հակառակորդի առաւելութիւնը ներխուժման վաղ փուլերում: Սա հնարաւոր է տեխնիկական մասնագիտացման, աշխարհագրական առաւելութիւնների օգտագործման եւ նպատակային անձնակազմի ու ստորաբաժանումների պատրաստման շնորհիւ:
3. Ձեւակերպել պահեստազօրային ուժերի կառուցուածքը, գործառոյթները եւ առաջադրանքները, ներառեալ յատուկ նշանակութեան ստորաբաժանումները, որոնք ունակ են գործել պատերազմի եւ աւանդական, եւ նոր տիրոյթներում: Առաջնահերթ ուղղութիւններն են՝
 - Թուային, էլետրամագնիսական, տեղեկատուական եւ հոգեբանական տիրոյթում գործողութիւններ՝ ստեղծելով ոլորտի մասնագէտներից բաղկացած մասնագիտացուած պահեստազօրային ստորաբաժանումներ:
 - Հայկական օդային տարածք մուտքը կանխարգելելու կարողութիւնների զարգացում՝ պահեստազօրային ստորաբաժանումների կողմից ԱԹՍ-ների եւ ՀՕՊ հրթիռային համակարգերի օգտագործմամբ: Այս ստորաբաժանումները պէտք է պատրաստ լինեն անյապաղ մարտական գործողութիւնների, իսկ պահեստազօրայինները պէտք է անցնեն շարունակական մարտական իրական ուսումնական փուլեր:
4. Պահեստազօրի համակարգի եւ պահեստազօրային ուժերի վերափոխման գործընթացին աջակցելու համար դիտարկել քաղաքացիական հասարակութեան նախաձեռնութիւնները, հարթակները, ոլորտային եւ մասնագիտական միաւորումները: Պահեստազօրային ուժերի համար մարզերում հիմնել ռազմա-տեխնիկական ուսումնական կենտրոններ հետեւեալ գործառոյթներով՝
 - Մարզումներ եւ ուսումնական վարժանք,
 - Նոր մարտավարութեան եւ նախատիպային սպառազինութեան փորձարկում,
 - Պետական, հասարակական եւ մասնաւոր ոլորտների համագործակցութեան խթանում:
5. Մշակել մեծ տուեալների վերլուծութեան համակարգ, որը ունակ կը լինի չափել պահեստազօրի համակարգի եւ պահեստազօրային ուժերի պատրաստութեան աստիճանը՝ բարձրացնելով համակցուած ամբողջական ուժերի վստահութիւնը՝ երաշխաւորուած կարողութիւնների առկայութեան նկատմամբ:

Հայաստանի պահեստազորի համակարգի եւ պահեստազորային ուժերի վերափոխումը կը պահանջի դրամական միջոցների ներդրում: Դրամական միջոցների յատկացման առաջնահերթությունը պետք է տալ այն բարելաւումներին որոնք կը յանգեցնեն պահեստազորային ուժերի մարտունակութեան որակական բարձրացման:

Պատերազմների բնոյթի փոփոխութեան արդիւնքում օրեցօր մեծանում է քաղաքացիական հասարակութեան կարողութիւններին, հմտութիւններին, փորձառութեանը եւ մասնագիտական համայնքներին հասանելիութեան պահանջը: Որպէսզի նման հասանելիութիւնը իրական դառնայ, անհրաժեշտ են փոխակերպումներ՝ եւ մշակութային, եւ ինստիտուցիոնալ մակարդակներում, քաղաքացիական եւ պաշտպանական ոլորտներում, ինչը կը խթանի աւելի լայն հասարակական վերափոխում: Պահեստազորի համակարգում եւ պահեստազորային ուժերում անհրաժեշտ է մշակել եւ ներդնել նոր մեխանիզմներ՝ մասնագէտների ներգրաւման եւ հասարակութեան լայն շերտերի մասնակցութիւնը ապահովելու համար: Համակարգը պետք է դառնայ միջավայր, որը լինելով գրաւիչ՝ նիւթական եւ բարոյական տեսանկիւնից, կը նպաստի ՀՊԱՀ-ի շրջանակում բազմազան կարողութիւնների եւ հմտութիւնների զարգացմանը եւ կապահովի թշնամու յարձակումները զսպելու կարողութիւնը: